

Artigo 23. Lexitimación, lugar e medios de pago.

1.- Pode realizar o pago calquera persoa, teña ou non interese no cumprimento da obriga, xa o coñeza e o aprobe o debedor, xa o descoñeza o obrigado ao pago. O terceiro que pague a débeda non estará lexitimado para exercitar diante da Administración tributaria municipal os dereitos que corresponden ao obrigado ao pago.

2.- Os pagos das débedas e sancións xestionadas pola Administración tributaria municipal realizaranse en efectivo nas entidades colaboradoras:

a.- directamente;

b.- por vía telemática, sexa a través das pasarelas de pagos das propias entidades financeiras ou a través da páxina web municipal;

c.- nos caixeiros das entidades que así o admitan.

3.- O pago das débedas e sancións que teñan que realizarse en efectivo poderanse facer por algún dos seguintes medios:

a) Diñeiro de curso legal

b) Cheque, axustado ó disposto no artigo 35 do Real Decreto 939/2005, de 29 de xullo, polo que se aproba o Regulamento Xeral de Recadación.

c) Transferencia bancaria, cos requisitos establecidos ó efecto no regulamento Xeral de Recadación.

d) Calquera outro medio que autorice a Alcaldía.

4.- Só poderá admitirse o pago en especie cando así de ordene por lei.

5.- O emprego de calquera medio de pago alternativo á entrega de diñeiro de curso legal non poderá implicar gasto algún para o Concello pola súa tramitación, agás do que o Concello teña conveniado coas entidades colaboradoras polo uso de tarxetas de débito e crédito. En caso contrario o gasto cargado ao Concello será automaticamente resarcido do importe abonado, continuándose o procedemento recadador polo resto da cantidade adebedada pendente de cobro.

Artigo 24. Pago mediante domiciliación bancaria.

1.- O pago mediante domiciliación bancaria realizarase nos supostos e cos requisitos regulados neste artigo.

2.- No suposto de aprazamentos, fraccionamentos e outros ingresos distintos dos de vencemento periódico e notificación colectiva, a domiciliación bancaria deberá axustarse aos seguintes requisitos:

a) Que o obrigado ao pago sexa titular da conta en que domicilie o pago e que dita conta estea aberta nunha entidade financeira.

b) Que o obrigado ao pago comunique a súa orde de domiciliación a Administración tributaria municipal.

3.- No suposto dos tributos periódicos que son obxecto de notificación colectiva a domiciliación bancaria deberá axustarse ás condicións que se detallan de seguido:

a) Comunicación á Administración tributaria municipal ben directamente, ben a través das entidades financeiras; neste caso as entidades comunicaran formalmente a Administración tributaria municipal para a eficacia da domiciliación. Poderá trasladarse a domiciliación a outra entidade de depósito coa comunicación á Administración tributaria municipal

b) As comunicacións para que teñan efecto no recibo do exercicio deberán realizarse dous meses antes do comezo do período de recadación establecido para o tributo ou ingreso de dereito público que se domicilia o pago. As efectuadas con posterioridade produciran efecto para o período seguinte.

c) As domiciliacións de pago terán validez por tempo indefinido, podéndose anular en calquera momento pola persoa ou entidade obrigada. Poderán ser rexeitadas pola entidade de crédito. Perderá vixencia a domiciliación nos supostos de devolución cando así o determine a Administración tributaria municipal sen necesidade de comunicación aos interesados.

d) O pago poderá domiciliarse nunha conta que non sexa de titularidade da persoa ou entidade obrigada ao pago, sempre que o titular da conta autorice a domiciliación.

4.- Os pagos efectuados mediante domiciliación bancaria entenderanse realizados na data de cargo en conta de ditas domiciliacións, considerándose xustificante do ingreso o que para dito efecto expide a entidade de depósito onde está domiciliado o pago. Este comprobante de cargo en conta deberá recoller, como mínimo, os datos que se establezan pola Administración tributaria municipal.

Artigo 25. Calendario fiscal.

Os períodos para pagar os tributos e outros ingresos públicos de carácter periódico que se xestionan por recibo serán os seguintes:

a) *Imposto sobre Vehículos de Tracción Mecánica*: desde o 15 de marzo ata o 15 de maio, ambos incluídos (ou día hábil inmediato posterior).

b) *Taxas por ocupación de vía pública (Vados e/ao mesas e cadeiras) e calquera outra taxa por ocupación de vía pública que se xestione por padrón*: desde o 15 de setembro ata o 15 de novembro ambos incluídos (ou día hábil inmediato posterior).

c) *Taxas polos servizos de subministración de auga potable, recollida do lixo e redes de sumidoiros*:

- 1º trimestre: do 15 de maio ó 15 de xullo do exercicio en curso
- 2º trimestre: do 15 de agosto ó 15 de outubro do exercicio en curso
- 3º trimestre: do 15 de novembro do exercicio en curso ó 15 de xaneiro do exercicio seguinte
- 4º trimestre: do 15 de febreiro ó 15 de abril do exercicio seguinte

d) *Taxas do mercado ambulante*:

- 1º trimestre: Do 20 de xaneiro ó 20 de marzo
- 2º trimestre: Do 20 de abril ó 20 de xuño
- 3º trimestre: Do 20 de xullo ó 20 de setembro
- 4º trimestre: Do 20 de outubro ó 20 de decembro

f) *Liquidacións mensuais do P.P. SAPI (Gardería) ou dos Servizos Deportivos*: Serán obrigatoriamente domiciliados e cargaránse como máximo no día 5 do mes seguinte.

g) *Imposto sobre Actividades Económicas e Imposto sobre bens Inmóveis*: desde o 15 de setembro ata o 20 de novembro, ambos incluídos (ou día hábil inmediato posterior), ou aqueles outros que determine o Servizo de Xestión Tributaria da Excm. Deputación Provincial de A Coruña.

Artigo 26. Sistema Especial de Pago (S.E.P.)

1.- Os obrigados ao pago que así o soliciten poderán pagar de forma fraccionada e mediante domiciliación bancaria as débedas polo IBI (sempre que o posibilite o Servizo de Xestión Tributaria da Excm. Deputación Provincial de A Coruña) e IVTM, devengadas a 1 de xaneiro do exercicio, sen que lles sexa esixible o pago de xuros de mora nin a prestación de garantías.

2.- Para acceder a esta modalidade de pago, os obrigados ao pago deberán cumprir os requisitos que de seguido se recollen:

- a) Non ter á data de aprobación do padrón do tributo correspondente ningunha débeda en vía executiva co Concello.
- b) Domiciliar os seus recibos en calquera entidade financeira.
- c) Notificar formalmente á Administración tributaria a adhesión a este Sistema antes do día 1 de xaneiro do exercicio no que se pretende a súa aplicación.
- d) Incluír tódolos seus recibos polo tipo de ingreso no que se acollen a este sistema.

3.- O sistema especial de pagos entenderase automaticamente concedido desde o mesmo día da solicitude sempre que se cumpran todos os requisitos establecidos no parágrafo anterior. No suposto de que a solicitude se presente despois da data indicada, a concesión terá efectos tributarios no exercicio seguinte.

De non se cumprir os requisitos establecidos a Administración tributaria municipal comunicará, antes do inicio do período de pago establecido e en todo caso antes do primeiro prazo, a denegación o a exclusión deste sistema especial de pago ao obrigado ao pago.

Unha vez incluídos os recibos neste sistema de pago entenderase prorrogado tacitamente agás desistimento expreso presentado antes do día 1 de xaneiro do exercicio no que se pretende a exclusión do sistema especial de pago, ou incumprimento de calquera dos prazos.

4.- O obrigado ao pago abonará mediante domiciliación as cotas tributarias fraccionadas, sen xuros de mora e sen obriga de prestar garantías, mediante o Sistema Especial de Pago nas seguintes datas (agás doutras que poida establecer o Servizo de Xestión Tributaria da Excm. Deputación Provincial no caso do IBI):

- Primeiro Prazo: 5 de maio.
- Segundo Prazo: 5 de agosto.
- Terceiro Prazo: 5 de novembro.